



PROGRAMA VACACIONAL TA INICIA AWE NA S.N.



Programa Vacacional ta inicia awe na S.N.

Iniciativa di Ministerio di Asuntonan General

Vakantie grandi a cuminsa. Seis siman largo hopi mucha y hoben no tin scol y ta na cas of riba caya sin mucho coi haci. Pa yena e bashi aki Bureau "Gemeenschapszin en Burgerparticipatie" di Ministerio di Asuntonan General hunto cu diferente otro departamento di gobierno a cuminsa for di aña pasa caba cu un programa educativo, recreativo y hopi varia pa entrene e hobennan durante e temporada di vakantie. Trabounan di "Bureau Gemeenschapszin en Burgerparticipatie" ta encera entre otro desaroya y ehecuta e proyecto dinamico Bo-Bario. E actividadnan cu ta bay tin den e barionan den e simannan nos dilanti cu ta parti di e plan vacacional, no ta solamente pa mucha y hoben, pero algun di nan ta pa adulto tambe.

Algun siman pasa Prome Minister Mike Eman a haya



e programa vacacional aki y eynan el a splica cu e meta pa cua a bin cu e Bureau aki ta pa formacion di e relacionnan den barionan na Aruba. Esaki

no ta solamente pa drecha e aspectonan fisico, pero sigur tambe pa pone atencion na e situacion social. Eman a enfatisa e dia ey cu comunitarismo mester

wordo fortifica na Aruba. Awe e prome actividad deportivo ta ranca sali den bario di San Nicolas. Pa 9'or di mainta e weganan di Pannabol ta cuminsa na

SportCentrum San Nicolas. Prome Minister ta bay ta eynan pa scop e prome bala. Tur mucha y hoben di e bario ta keda invita pa participa na e actividad aki.

Mariott Resort ta ofrece pakete of otro trabao den e Resort

Ya ta basta tempo caba, cu e situacion di e trahadornan den e Casino di Mariott Resort, ta saliendo for di man. Tur esaki, despues cu segun e trahadornan, nan a afilia na un sindicato.

E situacion a bira mas tenso den e ultimo dianan aki, na momento cu gerente di e Casino, a hasi un peticion na tur e trahadornan, cu nan lo por tuma un pakete of pasa pa un otro trabao den e Resort mes, ya cu situacion ta hopi preta na e Casino, segun gerencia a bisa nan den un carta. Den e carta aki e trahadornan ta haya e posibilidad pa pasa over pa un otro trabao of posicion cu ta habri, pa yena e vacaturanan aki cu ta entre otro; poolboy, supervisor na e bar y otronan.

Hecho ta cu e carta aki ta condi-

ciona un contesta, mas tarda awe tardi, na unda e trahadornan mester duna un contesta afirmativo ki posicion nan kier tuma, sino nan lo haya nan mes ta bai cas sin nada. Mas ainda cu gerencia a duna di conoce, cu ta te cu awe dialuna ta paga e trahadornan, despues di awe no tin nada mas pa esnan cu no a tuma nada.

Ministro encarga cu turismo, Otmar Oduber, a duna di conoce cu elo ta para na banda di e trahadornan di e Casino y cu elo bai mira mas afondo kiko henter e asunto aki ta encera.

E disputa aki entre e gerencia di Casino na Mariott Resort y e trahadornan den Casino ta saliendo for di man y cu no ta mira un solucion cla por lo pronto. No ta conoci, si



e trahadornan di dicho Casino lo a aserca e Mediador di Gobierno, Anselmo Pontilius, riba e particularidad aki, pa purba soluciona e tension cu ya ta existi entre e dos partido nan aki, ya pa basta tempo.

No ta conoci si Ministro Otmar Oduber lo bai tuma riba su respon-

sabilidad, pa soluciona e situacion aki of elo trece na conocimiento di Consejo di Ministro, pa mira kiko lo ta e pasonan mas adecua pa atende e asunto aki na Casino di Mariott Resort, cu ta indica di por bai for di man, si no bini un intermediacion of solucion inmediato.

Ministro di Utilidad, dispuesto pa reuni cu U.E.A. pa solucion

Ministro Mike de Meza, encarga cu Utilidad, a duna di conoce cu su persona ta d i s -



puesto, pa sinta cu sindicato Union Electricista Arubano, (UEA), pa soluciona e situacion di conflicto reinante, entre e sindicato y gerencia di Elmar.

Den e ultimo siman nan aki, a bin ta tende di diferencianan di opinion, constante netre tradornan di Elmar y gerencia y cu na dado, momento e impresion ta ser crea cu ni despues di sentencianan di Huez, e tranquilidad entre e dos partidonan aki ta keda pa basta rato, cu no tin un otro conflicto ta bini padilanti.

Ministro Mike de Meza, awor aki ta cla pa intermedia, entre e dos partido nan aki un biaha mas y a duna si di conoce cu e maheo diario ta keda den man di gerencia y esaki su persona lo no mete den djere.

Awor aki ta bin bon cla dilanti cu e sindicato ta vocifera, cu nan no tin ningun clase di confiansa mas den e director, Robert Henriquez y cu nan kier pa e bai como director for di Elmar, ya cu segun e sindicato, eno sa mahea e lugar.

E sindicato a manda un carta, siman pasa na unda e ta trece dilanti e hecho cu nan lo kier reuni riba e, "Comision di deferencia". Esaki ta trata riba e hecho cu e sindicato a perde e caso den Corte riba asunto di mas riba nan salario.

UEA, a duna gerencia di Elmar te cu diabierna cu a pasa ey, un ultimatum, pa reuni, pero esaki a vence y nada a sosode te cu awe

mainta. E siman aki, lo sigui un reunion entre e sindicato y su miembronan, pa determina ki paso nan lo bai tuma awor cu nan no a bolbe haya oido.

Elmar sinembargo a duna di conoce cu nan lo no reaccion, por lo pronto den medionan di comunicacion social.

Ministro Mike de Meza a duna di conoce cu su persona ta willing pa duna un man, pero mester tene cuenta cu Gobierno ta haya peticion diariamente, pa reuni tanto cu gremio priva, como esnan di Gobierno mes.

E ministro di utilidad ta enfoca riba e hecho, cu ta keda na gerencia di Elmar y e sindicato, UEA, cu ta nan ta na prome lugar yama pa sinta na mesa y soluciona e situacion reinante aki. Si esaki no logra, anto e proximo paso lo ta pa acudi na mediador di gobierno, Anselmo Pontiluis pa purba di haya otro.

Reina Beatrix ta desapropa pa huramenta Ministronan den publico

For di fuentenan fededigno, RTL Nieuws, awe tardi a duna di conoce cu su Mahestad, Reina Beatrix, a duna di conoce cu eta desapropa e hecho cu lo kier trece cambio den e forma pa huramenta e Ministro nobo nan den e proximo Gabinete cu lo mester keda instala, despues di eleccionnan parlamentario na september awor.

E sugerencia pa esaki ser cambia, a bini di Tweede Kamer, cu ta kere cu e hecho cu ta huramneta e Ministronan tras di porta sera, ta anticua y cu lo mester trece cambio na esaki.

Pero segun e informenan ta indica cu Prome Ministro Mark Rutte, a ser informa door di su Mahestad La Reina Beatrix durante di dia awe, cu esaki no por tuma lugar y cu eta desapropa e sugerencia aki.

E noticia aki no a cai den bon tera cerca Tweede Kamer, cu lo kier haya camaranan di television den e sitio na unda lo huramenta e Ministro nobo den e Gabinete nobo na september proximo.





Driftwood Restaurant ta Marca e di 26 Aniversario

Un sala di come yena cu bishitantenan internacional, procedente di e cuater skinanan di mundo, a celebra e di 26 aniversario di Driftwood Restaurant e siman aki.

Bishitantenan for di Merca, Brazil, Colombia y Italia, hospedando na Renaissance, Bucuti y Westin, djis pa nombra algun, a uni nan mes na e miembronan di staff anima cu tabata brindando pa e exito continuo di un di e isla su restaurantnan mas stima.

E restaurant ta den e mannan

di famia Merryweather pa mas cu un cuartal di un siglo, y mientras cu e sala di come a expande den transcurso di e añanan, hunto cu e menu, e factor di pisca fresco a keda mescos, ya cu Driftwood restaurant ta sirbi solamente e cuminda di lama mas fresco, mas recien pisca for di lama, unda nan tabata landa mainta trempa y ta wordo sirbi den e oranan di anochi, den su restaurant carismatico y bunita situa den e curason di Oranjestad.

E nomber y e decoracion sigur ta sostene e tema di e restaurant. Palo di lama gasta y bon uza ta

decora e murayanan di e salanan, acompaña pa glas di spiel, cocolishi, net di pisca, y articulonan maritimo bieu cu no ta den uso mas.

Esnan cu ta biniendo Aruba pa hopi aña kizas lo corda cu Driftwood Restaurant a cuminsa cu solamente 8 mesa, y un menu skirbi na man, cual Francine Merryweather a diseña, incluyendo e logo. E klechinan di mesa tambe a wordo cosi na man, y e ambiente distintamente comodo y intimo, cual bishitantenan di e restaurant, tanto local como stranhero, a haya irresistiblemente encantador.

Ainda e ta muestra y ta sinti basicamente mescos, cu un calidad di pisca fresco cu no a cambia, y e hospitalidad ameno estilo Arubiano. E famoso sopi di pisca semper a keda mescos, basa riba un receta bieu di famia.

Na mando di e restaurant, Herbert, un restaurateur apasiona di e di dos generacion cu ta pone hopi importancia riba e restaurant su experiencia di cena, percurando pa cada un di su bishitantenan disfruta di nan cuminda completamente.

Premier Eman no ta mira pakiko e mester ta na Hulanda

Manera nos redacion di Den Noticia a trece diabierna ultimo den nos edicion, na unda a elabora riba e hecho cu e tres Prome Ministranan di, Aruba Corsou y St. Maarten, a ser invita pa atende e reunion di Consejo di Ministranan di Reino.

E agenda oficial no ta conoci te awor aki, y mas bien eta keda un mistrio pakiko Aruba a ser invita, si e asunto cu nan lo bai trata entre otro ta e topico di Finansa di e islanan di Corsou y Sint Maarten, cu ta pasando den momentonan hopi dificil y Hulanda lo ta pidiendo

cuenta riba e asunto particular aki riba e situacion financiero.

Prome Ministro di Hulanda, Mark Rutte y Ministro encarga cu Asuntonan interno di Hulanda y di e islanan Hulandes den Caribe, Liesbeth Spies, a pidi pa e tres Prome Ministranan aki ta na e reunion di Consejo di Ministranan di Reino. Tambe ta invita na e reunion aki, e tres Ministro Plenipotenciario di e tres islanan aki cu a ser invita riba e particularidad aki.

Prome Ministro di Aruba, Mike Eman, a duna di conoce bon cla cu su persona sigur lo bai riba e

invitacion cu su persona a haya di Gobierno Hulandes, pero cu su persona, enberdad no ta mira e particularidad aki, ya cu si lo ta trata e asunto financiero di e otro dos islanan aki, esta Corsou y Sint Maarten, en berdad Aruba no tin ni arte ni parto den e asuntonan aki.

Speculacionnan ta lanta den e mundo politico na e tres islanan aki, cu kiko lo tin tras di e agenda oficial na Hulanda, debi cu ningun di nan ta mira pakiko Aruba mester ta eynan.

No ta conoci oficialmente si e Prome Ministro di Corsou, Gerrit

Schotte, lo atende e reunion aki na Den Haag, Hulanda, ya cu su persona ta tin caba planea pa viaha e siman aki pa China y eno a duna di conoce si elo cambia esaki y tog bai Hulanda, pa atende e reunion di Consejo di Ministro Hulandes, pa atende e asunto riba agenda cu ta regacra, e situacion di finansa di Corsou.

Prome Ministro Mike Eman, a declara cu e si ta cla pa atende e reunion aki, pa mira pakiko su persona tambe mester ta den e reunion aki.

Dama a asalta doño di auto dune un bati y bay cu e auto



Diadomingo merdia, un hyundai tucson full kibra cu flat tire a para na e machine di pump gasoline na Valero Boulevard tras di stuur ta baha un dama tur sushi y a drenta paden pa tank gasoline. Di biaha personal y security a raporta esaki na Polis unda patruya di trafico y Visibility Team a yega rapidamente y a bin topa cu e tucson A-42166 full kibra y no ta core mes, e dama chauffeur no por a ni cana riba su pia

di bou influencia pisa di un substancia cu e ta. E dama a dal e auto den Madiki altura di Budweiser y varios otro caminda pa e auto a keda total los.

Di biaha a cuminsa cu investigacion y a topa cu otro plachi number y e number pega riba e auto no ta ni cuadra y documentonan di otro hende ta aparece den e dashboard durante

control. E dama na e sitio no tabata copera cu Polis. E dama den San Nicolas a agredi un homber cu ta e doño di e auto y a batie formal lage benta abou atrake y bay cu e auto y bin te playa cune, e homber mester a bay te na hospital pa haya atencion medico na e golpinan cu e'la haya for di e dama aki, e homber lo entrega keho di atraco y agresion formal contra su persona.

Huespednan honra na Caribbean Palm , na ocasion di 25 aniversario

Durante e fiesta popular di cocktail di gerente cu ta tuma luga tur siman, gerente general Astrid Muller y miembro di e hunta di directiva, Randy Croes, a honra tres pareha cu ta regresando pa e resort pa hopi aña, despues di a cumpra un unidad di timeshare na Caribbean Palm Village Resort, binti-cinco aña pasa.

E parehanan Hostetter, Bloomfield y Semeleer-Wever a wordo presenta cu bunita plakkaatnan conmemorativo, mientras cu nan a para pa un oportunidad di saca portret cu miembronan di gerencia.

E parti cu nan tres storianan tin den comun ta e fe cu nan tabatin den e exito di e resort, mientras cu esaki tabata den su bruki ainda, y e dushi momentonan cu nan ta pasa ora cu nan regresa tur aña.

Na 1987, e pareha Hostetter a cumpra e camber di modelo di e resort di timeshare cu e tempo ey tabata bou di construccion, y te awe ainda nan ta disfrutando di e



mesun adres ora nan ta akinan. E pareha Bloomfield a dicidi di dobla nan placer y a cumpra un unidad di timeshare adicional na un dife-

rente resort situa banda di lama, y e pareha Semeleer-Wever ta viahando pa Orlando pa hopi aña como parti di e programa di intercambio

di Interval, ademas di keda extra simannan ora e muchanan tin nan vakantie, na nan cas leu di cas, e Caribbean Palm Village Resort.

Maestronan di Art Rules Aruba a tene un reunion di trabou

Anticipando e dia grandi di dialuna, Art Rules Aruba su maestronan a topa otro na Ventanas del Mar Restaurant pa un reunion di brunch y concretisacion di metanan prome cu e programa cuminsa.

Organisa pa e Pancake Gallery Foundation pa e di tres aña consecutivo, Art Rules Aruba ta lansando riba dia 9 di Juli, ofreciendo un programa di Arte educacional pa muchanan local cu ta den nan temporada di vakantie di scol.

E programa ta wordo teni na Atelier 89, na Oranjestad, y ta wordo presenta pa RBC Royal Bank, pa 201 adulto hoben entre e edad di 12 y 23 aña.

Tur e studiantenan a expresa un

deseo fuerte pa cultiva nan talentonan y habilidadnan artistico, y Art Rules Aruba ta proveendo nan cu e siguiente disciplinan e aña aki: Fotografia, Moda, Film, Baile, DJ, Arte Urbano, Musica & Presentacion y Teatro, duna pa profesionalnan local y internacional cu lo ta compartiendo nan conocimiento y experiencia cu e hubentud di Aruba. Ventanas del Mar restaurant a ricibi e ekipo riba diadomingo, cu e maestronan procedente di e Reino Uni, Merca, Canada, Hulanda y Aruba.

Ira & Ayra Kip, di e Pancake Gallery Foundation ta raporta cu e programa lo ta enfocando riba disciplina como un balor central

riba e caminda pa exito. Forsa fisico tambe lo ricibi atencion, ya cu muchanan awendia ta wordo hiba pa nan lesnan door di nan mayornan, resultando den menos actividad y condicion fisico.

Musica & Presentacion, un disciplina introduci e aña aki pa e prome biaha, tabata sumamente den demanda, e rumannan Kip a splica, aceptando muchanan cu ta canta y esnan cu ta toca instrumentonan. E les di DJ a disfruta di un aumento den e cantidad di participantenan cu a registra, y lo wordo duna pa un maestra cu ta un DJ femenino. Mientras cu baile y teatro a yena na un forma hopi bon, hopi mas a registra pa lesnan di Moda

y Fotografia. E curso di fotografia di e aña aki lo ta documentando e evolucion di Aruba su hubentud como artistanan, resultando den imagennan excelente na final di e dos simannan. Film lo wordo duna pa un ekipo di dos, como tambe Arte Urbano. E studiantenan lo ta contribuyendo na e refrescamento di e proyecto di vivienda na Madiki, presentando e bario cu un pintura di muraya, ehecuta bou di e wowo experto di no solamente un, pero dos maestro di arte.

Art Rules Aruba no lo tabata posibel sin e sosten di negoshinan local, cualnan tur a contribui pa inverti den e programa, cual ta mas cu djis un tayer di zomer.

Segun: S.E.P.P.A-SADA-SINBA y SDU

STATUS PLAN DI RECUPERACION

Na e momentonan aki tin hopi confusion y informacionnan no completo ta circula rond cual ta hasi tambe cu e participantenan den e fondo naturalmente ta bira nervioso y kier sa kiko exactamente ta pasando. S.E.P.P.A.-SADA-SINBA y SdU a discuti e tema aki y tambe nos a buska e informacionnan necesario pa asina nos por duna nos miembronan informacionnan te na unda esaki ta conoci pa nos.

Nos meta semper ta keda pa vigila e desaroyonan rond di e fondo di pensioen y ta importante pa e participantenan ta informa. Pero loke tambe ta importante ta pa nos por hasi esaki na un forma responsable, correcto .

APFA tin un deficit netto di alrededor di 642 miyon florin. Esaki ta inclui e capital di reserva cu ta rekeri pa yega na un cobertura di

100%. E deficit aki ta procedente di e areglo di pensioen PVL. E deliberacionnan ta trata principalmente e forma con pa ehecuto e acuerdo referente e garantianan cu gobierno a duna y e periodo den cual e recuperacion mester tuma lugar.

E puntonan di salida di e plan di recuperacion cu ta riba mesa na e momento aki y cu e partidonan a alcanza den principio un acuerdo riba dje, ta papia di un recuperacion den 15 aña, pago di e garantia di rendimiento acorda den un suma anual fiho, y refinanciamiento di e deficit.

Segun informacion ricibi tin un discusion huridico entre APFA y gobierno riba e formalisacion di e obligacionnan financiero cu mester wordo acorda, e atraso den pago di e sobresueldo periodico (duurte-toeslag) cu ta suma Afl. 30 miyon y e liquidacion di e prima aumenta di 2010.

E sobresueldo periodico no ta

parti di e areglo di pensioen. E parti aki ta wordo paga na pensio-nadonan di acuerdo cu e maneho di indexacion di gobierno. Pues e ta un obligacion financiero di Pais Aruba y no di APFA.

Segun cifranan obteni di APFA, gobierno ta pagando corectamente na APFA tur prima cu e ta retene di e empleadonan publico y tambe su mesun contribucion pa loke ta trata e areglo di pensioen NPR 2011.

S.E.P.P.A.-SADA- SINBA y SdU ta sigui e desaroyonan di cerca y nos ta di opinion cu esaki ta wordo hasi tambe pa tur otro sindicato. Segun e estatuton di APFA, e 12 sindicatonan cu ta representa e participantenan den e institucion aki tin nan representacion den e Junta di Supervision cu ta consisti di 5 persona; un representante di Pais Aruba, un respresentante di e demas dunadornan di trabou y dos representate di sindicato. E ultimo nan aki ta wordo apunta door

di e sindicatonan conhuntamente. Conhuntamente e miembronan di e Junta di Supervision, ta supervisa, aproba y stipula e maneho empresarial di APFA. Y nan tin e obligacion di haci esaki na un forma cu ta tene debito cuenta cu tur e interesnan envolvi. Directiva di APFA na su turno tin e obligacion di duna informacion riba e situacion di e fondo. Ta mas cu claro cu tur atencion di sindicato ta dirigi na e momento aki pa keda haya informacion detaya di locual ta pasando den e deliberacionnan entre gobierno y APFA pa haya mas claridad den e plan di recuperacion y e plan di ehecucion como tambe e consecuencianan cu esaki por tin riba e participantenan.

Na e momento aki ta hopi cla pa nos cu APFA y gobierno ta trahando pa yega na e ehecucion di e acuerdonan pa loke ta trata e deficit y e pagonan cu mester wordo realiza door di gobierno pa cumpli cu e garantianan stipula.

Studentantenan cu ta bai den exterior ta preparando

Manera ta conoci, tur e studentenan cu ta bayendo bai sigui nan estudio avansa den exterior, na e momentonan aki ta preparando nan mes tur cu tin, debi na e hecho cu e tempo ta pretando riba nan.

Falta algun siman mas prome cu e studentenan sali pa Hulanda y otro partinan, manera Merca y Centro y Sur America, pa sigui nan estudio avansa.

Mayoria di studentenan a pasa ta pone nan docu-

mentonan na ordo y hasi ta prepara nan mes den cushinamento y otro cosnan di cas, cu nan ta bai haya nan mes ta hasi den exterior.

Tin varios reunionnan cu a ser teni cu e studentenan cu ta bai den exterior riba diferente topico y ainda falta representantenan di Gobierno di e departamento di Educacion, cu lo mester duna nan ultimo instruccionnan na e studentenan, prome cu esakinan bai riba

avion.

Nos tin entendi tambe cu manera ta e caso di tur aña, na yegada di e studentenan na Schiphol, Hulanda, nan lo wordo ricibi, pa esnan di Cas di Aruba y tambe pa Ministro Plenipotenciario, Edwin Abath, kende lo yama nan un bon bini na nan cas nobo y lo deseanan tur clase di exito den nan estudio y tambe na unda elo indica na e studentenan aki, cu su persona y henter e staf di Cas di

Aruba, lo ta na nan disposicion pa cualkier eventualidad cu por surgi, durantem nan estadia na Hulanda.

Riba e mesun dia di nan yegada na Hulanda, busnan lo ta cla pa hiba e studentenan na nan respectivo destinacion rond di Hulanda y na unda nan guianan lo sa di prepara un programa pa cada estudiante, por haya e ayudo pa incorpora den e ciudad cu su persona lo bai biba.

No ta conoci si manera

antes, lo tin un comision di despedida pa e studentenan aki na nos Aeropuerto Internacional Reina Beatrix, pa Gabinete Eman, manera semper tabata e caso na momento cu e partido berde ta na mando. Sigur esaki lo ta algo bunita y ta di spera cu elo por ta e caso ainda, ya cu henter e comunidad ta biba cu e studentenan aki via television, Ohala cu esaki lo por ta posibel e aña aki atrobe!



Sifranan no ta gaña.....

Kòrsou a registrá defisit di 500 mion florin riba balansa di pago

WILLEMSTAD. (B) — Pa di prome biaha den diesun aña balansa di pago di pais Korsou ta mustra un deficit di 500 mion florin.

Un di e motibunan prinsipal ku a kondusi na e redukshon aki ta un bahada di transferensia neto ora ku e programa di saneamentu di debenan 2010 a finalisa.

Di otro banda eksportashon a subi komo resultado di e montante ku refinaria Isla a risibi pa su aktividatnan di refinashon.

Otro aspektonan ku a kontribui na nos oumento di eksportashon ta nos entradanan prosedente di bunker, re-eksportashon di parti di e empresanan ku no stin den zona

franko, drechamentu di barku i nos turismo segun presidente di Banko Sentral di Korsou i Sint Maarten, dr. Emsley Tromp, a bisa ayera tardi durante un konferensia di prensa.

Dr. Tromp a bisa sinembargo ku den e mesun rosea mester fiha atenshon riba e hecho ku kresementu di nos eksportashon a keda limita pa motibu di un bahada den e divisanan genera pa nos sektor di servisio finansiero.

Importashon a oumenta komo konsekuensia di un preis promedio mas haltu di krudo riba merkado internashonal i mas importashon di merkansia den nos zona franko i den komersio tantu por mayor komo detal.

Sektor servisio finansiero internashonal ta importante pa nos balansa di pago

WILLEMSTAD. (B) - Segun dr. Emsley Tromp, e sektor di servisio finansiero internashonal di nos pais ta keda importante pa drecha e defisit riba e kuenta koriente di nos balansa di pago.

Un di e pasonan ku Banko Sentral a tuma pa atendé ku e defisit kresiente di nos kuenta koriente riba balansa di pago i e kresementu di kredito den sektor priva tabata restringi e espasio riba nos merkado di kapital, di plaka.

A oumenta e porshentahe di reserva ku ta rekeri pa bankonan komersial te na 10.5 porshento na kabamentu di aña pasa.

Pero mester hasi menshon di e hecho ku ta riba termino kortiku so medidanan riba tereno di maneho monetario ta alivia e situashon.

Korsou i Sint Maarten ku tin un ekonomia chikitu i habri mester

tuma medidanan struktural pa stimula eksportashon di akuerdo ku dr. Emsley Tromp.

Den e konteksto aki Banko Sentral ta boga pa esfuersonan konhunto pa duna nos sektor di servisio finansiero internashonal e posishon ku e tabatin anteriormente komo un di e pilanan ekonomiko ku tabata genera sentenares di miyones di divisa pa aña.

Na mes momentu e tabata krea tambe puestonan di trabou riba nivel haltu.

Esfuersonan ku e sektor aki a hasi resientemente no a duna e frutanan desea ainda pero ta hustamente pa e motibu aki lo mester ta posibel pa krea kondishonnan nesesario atraves di un union di forsa den e sektor aki, inkluyendo gobiernu i Banko Sentral, pa di e manera aki sektor finansiero por bai florese di nobo.

Lito i Blitz a djòin pa huntu nan sigui ku mensahenan positivo pa nan amiguitunan

WILLEMSTAD - Djabièrnè último durante di un mini konsierto di Blitz den Willemstad Room di Hilton Hotel dilanti di mas ku 200 amiguitu, Lito e Amiguitu Spardó huntu ku direktor di Maduro & Curiel's Bank, sr. Michael de Sola a anunsiá ofisialmente e koperashon entre Lito i Blitz.

Sr. Michael de Sola a hiba palabra i a bisa: "Lito, e Amiguitu Spardó ta trata semper pa duna un aporte positivo na desaroyo di tur mucha riba diferente área, spesialmente ku su proyekto di 'Kuida Bo Skol i Stima Bo Skol', ku ta enserá Kore Pa Bo skol, Lesa pa Bo skol, Kanta den kor pa Bo skol i Kanta Tumba pa Bo skol. Importante ta ku e muchanan ta sentral den e proyektonan di Lito i e muchanan ta haña un oportunidat di mostra i desarojá nan talento i gana premio pa nan skol. Pero Lito so no por hasi tur kos. Awor huntu ku Blitz, Lito por reforsá su mensahenan positivo na tur amiguitunan di Lito via di kanto, baile, videoclip, jingle i tv spot. Blitz ta un ehèmpel kon muchanan ku dedikashon i disiplina por realisá nan soño dunando show kantando i bailando i kombiná esaki ku mensahenan masha positivo ku ta yega muchu mas fásil na e muchanan. Blitz su kansionnan ku mensahenan positivo, ku ritmo alegre i yen di zjeitu mester sirbi komo un inspirashon pa

nos muchanan siña bon na skol, kuida nos medioambiente, tin respèt pa otro i pa tin un komportashon ehemplar na skol i na kas". Pa seya e amistad i koperashon entre Lito i Blitz, Michael de Sola huntu ku Lito i tur e artistanan di Blitz, Tiffany, Xechell, Beyonce, Timothy, Tishona i Gedion a hasi un promesa dilanti di tur mucha, prensa i invitado ku tabata presente, ku huntunanan lo sigui ku mensahenan i eventonan positivo di un manera diferente pa nan amiguitunan.

Maduro & Curiel's Bank ta gradisí e organisashon di Blitz, e mayornan di e artistanan i tambe e guidadonan ku boluntariamente ta koperá ku nos

muchanan, pa nan konfiansa pa asepatá Lito komo nan partner.

Michael de Sola a finalisá bisando: "Tur amiguitunan di Lito keda pendiente pa TV spotnan ku mensahenan bunita di Blitz huntu ku Lito, "Fakansi ku Deporte" organisá pa Sedreko i patrosiná pa Lito ku lo tuma lugá den e di tres siman di Yüli na SDK i tambe e popular "Lito Film Festival" na The Movies den e promé siman di ougùstùs. Ku e eventonan aki nos ke kontribuí den edukashon di e mucha pero alabes nos ta konsiente ku nos mester kontribuí pa yuda e mucha dibertí sanamente tambe i asina yuda krea mihó hende pa nos komunidad".

Jacintha Cosntansia ta haña ku :

Pueblo di Kòrsou a gana den kaso di importadónan di remedi

WILLEMSTAD. Minister Jacinta Scoop- Constancia i Minister Nasser El Hakim a elaborá tokante e tema preis máksimo pa remedi i e último desishon di Wes den esaki. Tur dos mandatario a mostra ku pueblo di Kòrsou a gana i ta spera ku awor lo sigui manera a keda palabrá.

Minister Scoop-Constancia a mostra tambe ku SVB a hasi investigashon i no ta bèrdat ku stipulashon di preis máksimo ta baha kalidat.

E dos ministernan a sinta ku importadónan di remedi i lokual a sali for di e deliberashonnan aki ta ku ta tarda pa importadónan haña nan pago. Pa loke ta trata un posibel kreashon di skarsedat di remedi di parti di importadónan, Minister Scoop-Constancia a mostra ku e lo no asepta esaki pasobra aki ta trata di bida di

hende.

Minister El Hakim a enfatisá ku remedi na Kòrsou ta inhustamente karu i ku pueblo di Kòrsou ta sufriendo bou di esaki pa hopi aña kaba.

Minister El Hakim a sigui splika ku gobièrnanan anterior no a protehé nos pueblo i ta deber di Gobièrnu pa protehé yunan di pueblo i nan sí a hasi esaki.

For di luna di novèmber 2011 a finalisá dos rapòrt tokante bahada di preis di remedi. Especialistanan di salubridat i ku konosementu hurídiko a sostené e investigashon. Banda di esaki resultadonan di e investigashon a keda sostené dor di un konsultant internacional ku ta afiliá na un universidat na Hulanda.

Ku e triunfo di pueblo den korte, Minister

Scoop- Constancia ta splika ku e desishon aki lo habri kaminda pa sigui ku reformanan den sektor di salubridat.

Sektor di salubridat ta kosta komunidad 661 mion florin pa aña i sin reformanan, manera na hopi otro paisnan tambe a keda introdusí, esaki lo sigui oumentá.

Esaki tin komo konsekuensha ku lo no por garantisá ku komunidad ta sigui haña kuido na nivel.

Riba potrèt, Minister di Desaroyo Ekonómiko señor Nasser El Hakim i Minister di Salubridat Públiko, Medio Ambiente i Naturalesa señora Jacinta Scoop- Constancia durante su diskurso den e reuda di prensa di djabièrnè último.

Wes ta kere siegamente den bon intenshon di gobièrnu

Importadónan ta konsiderá pa apelá despues di veredikto desepshonante

WILLEMSTAD — E asosiasion di importadó di remedi VIPP a keda ku sabor margu den su boka despues di a pèrdè un wisio sumario kontra gobièrnu pa un regulashon drástiko di e sektor di importashon di remedi. Huntu ku e abogado ta wak kiko e posibilidatnan ta pa apelá òf otro paso, ya ku unilateralmente lo amargá bida di e sektor si no kambia nada na gobièrnu su medidanan. Nan lo kousa ku e sektor ta kremp ku hopi retiro komo resultado i e riesgo di un skarsedat króniko di remedi.

Anke ku nan ta rekonosé ku pa un wes den un wisio sumario no ta posibel pa investigá tur aspekto den detaye, pasobra ta trata di un materia kompliká, tòg VIPP tin e impreshon ku wes ta kere sie-

gamente den e intenshonnan di gobièrnu.

No por sera wowo pa e echo ku nan a negligishá e argumentunan di VIPP por kompleto.

Ta durante e tratamentu di e kaso numa a bira posibel pa apliká un tempu rasonabel di transishon (grace period) pa por bende e stòk di remedi na e preis bieu i ku ta bai reevalúa e lista di preis máksimo pasobra e lista di gobièrnu no ta klòp di niun banda.

Promé ku esei nan no tabata ke tende nada di esei. Ademas e magistrado a negligishá por kompleto ku gobièrnu di un forma sistemátiko a evitá diskutí ku e sektor riba kontenido. Ta imponé a imponé e medidanan. E sektor mester guli

manda abou. Pa definishon un akitut intransigente asina ta frustratur forma di diálago sano.

Hasta un akuerdo preliminar ku nan mes konseheronan gobièrnu a kita resueltamente for di mesa. Pa gobièrnu laga parse na e Kolegio di supervishon finansiero (Cft) ku e ta traha seriamente na ekonomisashon i reforma, ta sakrifiká e sektor farmaseutiko, Dios sa pa habri kaminda pa interesadonan nobo ku ta bon ku gobièrnu. Gobièrnu su defensa ku esaki ta na interes general ta un argumentu fantasma. Si wak desaroyo for di novèmber aña pasá ora a reuní pa promé be, ya aya e desishon tabata tumá kaba. Djis pa laga parse ku a dialogá ku VIPP, a sinta na mesa ku nan. Tabata un asunto prefabriká. Ni mes

gobièrnu no a kumpli na tempu ku e promesanan ku el a hasi durante tratamentu di e kaso i tòg wes ta presumí ku gobièrnu lo tin bista i oido pa e opheshonnan di e sektor.

Pronto komunidad lo bolbe sinti e konsekuensianan di esaki. Despues di e veredikto VIPP ya no tin e ilushon mas ku e akitut di gobièrnu lo kambia, ménos ainda drecha. Al kontrali. Gobièrnu lo sinti'é reforsá i lo mira esaki komo legitimashon pa e dal bai manera el a bin ta hasi. Pa motibu di e sentensia desepshonante den e wisio sumario, e miembronan di VIPP ta kontemplando pa sea apelá e sentensia òf tuma otro paso pa pone un paro na gobièrnu su maneho pa kibra kos i pa garantisá kontinuidat i kalidat di e sektor.

“Oranjestad ta haya su hospital renova y S.N. ta ser boycotea pa M. Eman”

Algun siman atras....a worde presenta na comunidad di Aruba e 'maquette' di e expansion y renovacion di Hospital dr. Horacio Oduber. E proyecto ta ensera un inversion di 180 milyon florin(100 milyon dollar) cu lo worde inverti. Segun e informacion e proyecto lo ensera :

Construcion di un Edificio nobo
Renovacion di actual edificio.

Construcion di un parti(hospital)
dedica na un parti psicologico.

Construcion di un Edificio unda
lo por studia enfermeria etc.

Tambe lo bini un parti unda nos
grandinan lo por keda.

Notable tabata e informacion
den prensa y nos ta cita: “ E prome
cambianan cu lo por mira ta e construc-
cion di e camber di operacion
pa hasi intervencion cardiologico
.....”

Tur esaki lo duna e proyecto aki

e derecho di hiba e nomber un
'Centro di Medicina' pa nos socie-
dad Arubano.

Di parti di Gabinete Mike Eman
nos por a tende cu nan lo kier un
'five star Hospital' aki na Aruba !!
Y mes notable ta cu parlamento
como representacion di pueblo a
keda relativamente keto riba e vi-
sion aki.

E SITIO.....? A TENE CUENTA
CU E PROBLEMATICA DI AWA
DEN FUTURO ...?

Na prome lugar partido PPA ta
di opinion cu gobierno di Aruba
esta Gabinete Mike Eman(AVP)
debe nos comunidad un splicacion
di con gobierno y top di Hospital a
scoge pa e expansion y construc-
cion aki tuma lugar na e mesun
sitio unda e actual hospital ta...
mientras e ultimo 35 ana cu e hos-
pital ta na e sitio aki.....el a worde
severamente criticacomo un
sitio NO correcto....y cu lo mester

bini un Hospital 'meimei' di Aruba.
E critica aki nos PPA a tende di-
rectamente di partido AVP durante
e ananan cu a pasa. Den pasado
hopi a kere den un hospital den
cercania di 'drive inn' mientras
cu bao di gabinete Oduber nos a
tende cu nan lo tabatin inten-
cion pa construi un hospital nobo
na Cumana. PPA ta ripitiGabi-
nete Mike Eman (Ministro Visser)
mester splica e argumentacion pa
mantene e Hospital y cu expansion
na e sitio actualbasa riba cual
argumentacion esaki a tuma lugar
??

Na mes momento PPA lo kier
pone construcion di TUR edificio
den cercania di nos 'beachnan'
den contexto di "Climate change y
rising sea waters". Riba diferente
isla den Caribe ...tin un 'stop' riba
construcion di Edificio serca di
lama....specialmente si trata si-

tionan abao cu lo por worde afecta
pa lama mas facil !. E prohibicion
riba varios isla ta hasta den mane-
ho NACIONAL y leynan ta den pro-
ceso di worde introduci. Historia ta
dictacu unda nos Hospital dr.
Horacio Oduber ta.....ta un sitio
cu ta worde afecta severamente
durante jobidanan pisa ... pero
tambe ta den e 'area' unda lama
normalmente kaba sa tin 'efecto'
(e.o. Bushiri Hotel ...Manchebo
etc)... Pregunta publico di PPA na
Gabinete Mike Eman(AVP) ta....
cu si a tene cuenta cu e efecto di
'rising sea waters' y su efecto riba
un Hospital na e sitio aki ?? Si
No kier kere PPA anto nos kier re-
cordabo na e ponencia di profes-
sor Schragg di Harvard university
durante su bishita na Aruba....cu a
bisa....."aki 30/40 ana ALL your
hotels will be standing in sea wa-
ter....." !!!! A evalua esaki ora e
planifica e proyecto aki ?????

Competencia Hubenil Gang di Arte 2012

E aña aki Gang di Arte ta
celebra su di 6 aña y e ta
mustra di bira un otro exito
mirando e calidad, talento y
entusiasmo di e participan-
tenan.

Departamento di Cultura
Aruba (DCA) ta sigui eleva
e competencia aki na un
nivel mas halto, brindando
e maximo ganado(nan) e
oportunidad pa haci un in-
tercambio di nan obra na
nos hermana isla Corsou.
Tambe e ganado(nan) lo
fungi como cara di e com-
petencia y lo representa
Gang di Arte na diferente
actividad durante henter
un aña poniendo e enfoca
riba e desaroyo artistico di
e hobenan(nan).

Gang di Arte cu ya ta hopi
conoci den nos comunidad,
ta ofrece un plataforma pa
e hoben por expresa, ex-
perimenta y presenta di-
lanti un publico grandi riba
un escenario cu excelente
condicionnan tecnico y pro-
fesional.

Tur aña Gang di Arte ta
bin cu un tema y e tema
oficial di e aña aki ta 'Stra-
ño', na unda e hobennan lo
mester crea un obra artis-
tico cu ta refleha esaki y pa
medio di nan interpretacion
yega na un resultado artis-
tico completamente unico y
original. Mescos cu tur aña
ta ofrece un programa di
preparacion pa yuda y guia
e hobennan cu ta participa.
Ta importante pa menciona
cu e participacion aki ta
completamente gratis.

E preparacion ta consisti
di diferente tayer cu ta tu-
mando luga na entre otro
Ateliers'89 riba Dominican-
essenstraat y na DCA mes.

For di algun siman caba
prome cu e competencia
nan ta hopi activo, na unda
nan lo ta hayando topi-
conan di interes riba dife-
rente tecnica di presenta-
cion, improvisacion, traha
den grupo, integracion,
desaroyo fisico, creativi-
dad, entre otro. Tambe du-
rante di e tayernan aki na
a haya bishita di diferente
prensa tanto internacional
y personalidadnan impor-
tante. Entre nan, bishita
for di Corsou y tambe nan
tabata tin e honor di por
ricibi e bishita di Sr. Lavelle
Smith Jr. (Award Win-



ning Choreographer to the
stars). Kende ademas di a
wak e hobennan improvisa
riba diferente obhetonan
straño, a conta parti chikito
di su historia y a comparti
su experiencianan. El a
contesta, haci pregunta
y a duna algun tips como
tambe a traha un coreogra-
fia chikito cu e hobennan
presente.

Sr. Smith ta un coreo-
grafo internacional di
Prince, Diana Ross, Mi-
chael Jackson, Beyonce y
hopi artista mas!

Gang di Arte ta un com-
petencia dirigi na hoben-
nan entre 14 pa 20 aña di
edad cu tin talento creativo
y activo riba tereno di arte
visual, video, fotografia,
arte di palabra, baile, DJ,
literatura, moda, multime-
dia, musica y/of teatro. E
hobennan ta preparando
fuertemente pa mustra
Aruba nan creacion propio
y nan poder di expresion
riba un escenario profe-
sional. Creando pasion pa
Arte!

Island Temptations ta marca su di 10 aniversario

Culture • Lifestyle • Faces SUMMER 2015

ISLAND TEMPTATIONS
10th Anniversary Edition

The Pinup Girls
Volume Two



Tempo en berdad ta bula ora bo ta pasando bon, y pa e ekipo di Island Temptations ta dificil pa kere cu 10 aña a pasa desde cu nan a tene nan fiesta grandi di lansamento cu a desvela e prome edicion di loke lo bira e isla su unico revista

ganador di premio, di cual mas notable tabata tres Premio di Escritor di Viahe for di e Caribbean Tourism Organization pa e promocion excelente di e region.

Diez aña ta ensera 31 edicion

cu a presenta e isla su artistanan talentoso, musicantenan, chefnan, eventonan, actividadnan, deporte, y flora y fauna. “Ainda mi ta corda algun hende cu a conta mi diez aña pasa cu no tin niun manera cu nos lo por bin cu suficiente material fresco cada biaha pa tene e revista yena cu articulonan y informacion, ya cu e isla tabata demasiado chikito y no tabatin suficiente material pa mas cu un edicion pa aña...Mi ta kere cu nos a comproba cu nan no tabata corecto, pasobra practicamente tur caminda cu bo wak y cada skina cu bo bira tin un personalidad interesante, un talento cu no a wordo descubri ainda, of un perspectiva nobo di loke ta haci e isla aki asina unicamente bunita,” e revista su director editorial y creativo, Tina Causey-Bislick, a comparti.

E revista su portadanan a bira imagennan iconico, captando e atencion di su lectoran for di e cuminsamento, cu cada portada presentando algo un tiki diferente cu e edicion cu a bin su dilanti. E prome articulo den e edicion di e di 10 aniversario ta presenta tur e portadanan di pasado, cu comen-

tarionan for di lectoran, amigonan y famia tocante nan portadanan favorito y mas memorabel.

E portada mas nobo y e portretan cu ta acompaña e portada den e revista ta presenta pinups famoso di e pasado, recrea segun cada detaye chikito cu un toke Arubiano. “Nos prome edicion di Pinup tabata na 2008, y tabata un di nos edicionnan mas popular, asina ta, nos a dicidi di bishita e concepto atrobe, cu hasta mas energia y atencion pa detaye cu nos a yega di duna—sigur nos articulo di portret mas ambicioso cu nos a yega di haci...y nos no por ta mas orguyoso di e resultadonan y tur e trabou duro nos ekipo a haci pa por haci e posibel,” tabata e palabranan di e revista su director di relacionnan publico y proyectonan special, Rona Coster.

E edicion di e di diez aniversario tambe ta hiba nos bek den pasado cu hopi di e artistanan cu a yega di sali den e revista, ta haci un otro bishita serca tres musicante contemporaneo riba e isla, ta explora cuminda cu ta menos conoci, como tambe hopi di su articulonan y columnanan regular.

Arugas ta limita seis cylinder pa aña pa cas

Ultimamente tin un desaroyo nobo cu a manifesta su mes, na unda doñonan di cas rond di nos isla ta haya nan mes limita cu ta solamente seis cylinder di gas por haya pa aña y cu si yega e cantidad aki, lo no por haya mas cumpra.

E pregunta cu ta ser hasi na e momentonan aki ta, mirando e situacion economico precario cu nos isla ta bibando aden, ta hasi cu hopi hende ta busca manera ta crea algo pa genera placa pa nan por sobrevivi den e epoca aki.

Mirando e hecho cu gerencia a

limita seis boter di cylinder pa cas pa aña, ta hasi cu hopi hende cu lo por a bai hasi cuminda, traha bolo of cualkier otro cos pa haya entrada extra, ta haya nan cu esaki no por mas, debi cu gerente di Arugas a limita nan pa hasi esaki, door di impone un limite na seis boter di cylinder di gas pa cada cas rond di nos isla.

Solamente negoshi y restaurantnan por haya mas cu esaki, segun informacionnan ta indica.

No ta conoci, si gerencia di Arugas lo por bai evalua e desicion aki cu ta limita cada cas na seis boter

di cylinder di gas pa aña y lo por bai hasi un excepcion y por hisa e cantidad aki na mas cu seis boter di cylinder di gas.

Mirando cu Arugas ta un compania independiente y priva, no ta mucho cos cu Gobierno lo por hasi, sino mas bien intermedia y purba na trece clarificacion riba e topico aki y si lo por yega na solamente hasi un apelacion na gerencia di Arugas. Mas no ta den man di Gobierno cu elo por hasi, ya cu eta limita y no por bisa nada den e operacion diario di e empresa di Arugas.



Elmar kier yega na areglo cu clientenan cu tin atraso



Manera ta bon conoci, e cantidad di e consumidornan cu a cai a tras cu nan pago di nan cuenta di coriente na Elmar, awor aki lo haya e oportunidad pa yega na un areglo pa paga esakinan. E consumidornan aki, lo mester pasa na oficina principal, pa por hasi esaki y di e forma aki, e consumidor, lo por haya su meter di coriente, conecta atrobe.

Manera ta conoci, e cantidad di esnan cu no tin meter di coriente na nan cas, a subi drasticamente y ta un cantidad considerabel y gerencia di Elmar, no kier bai den detayes di e cantidad, pero e montante di e casnan na e momentonan aki sin coriente a subi masha hopi mes.

Ta pesei awor aki, gerencia ta hasi un yamada na tur esnan cu debe coriente pa mas cu

dos luna y cu nan meter a ser desconecta, pa pasa na su oficina principal na Playa y pa yega na un areglo y di e forma ey por haya nan meter conecta mesora. Claro cu una vez cu bo yega na un areglo, lo mester cumpli cabalmente, tur luna cune, sin faya y na mes momento paga esun normal cu lo sigui bini.

Gerencia di Elmar ta sigur cu esnan cu ta sin coriente lo sa di hasi bon uso di e oportunidad aki, pa di e forma aki haya nan meter conecta atrobe na nan cas.

Mester bisa cu den e ultimo tres luna nan aki, e cantidad di consumidor di coriente, a haya nan confronta cu nan meter di coriente a ser kita debi na e atrasonan den recibo.

E situacion economico riba nos isla, ake ta ser bisa cu cosnan ta bon, mester indica cu por medio di e situacionnan aki entre otro na Elmar, por nota cu cantidad di casnan rond di nos isla ta haya nan den problema pa fin di luna paga nan cuentanan na tempo, entre otro esun di Elmar.

E situacion, entre otro di e consumidornan di awa, tambe ta indica cu esnan cu nan meter di awa a ser kita, tambe ta subiendo den e cantidadnan rond di nos isla.

Ta di spera cu e oportunidad nobo cu entre otro Elmar ta duna lo sa di wordo aprecia pa su consumidornan. Na mes momento ta pidi cada ciudadano, pa regula nan gastonan, pa no haya nan mes den situacionnan asina aki mas.

**orocasharuba**
PIN:27953FF2

OROCASH®

CUMpra Y BENDE



Si bo kier GANA 2.000 fls envia e frase "OROCASH ta paga mas miho" pa nos Facebook o BB PIN

8:00 AM a 10:00 PM **Telf: 582.49.89** **Av. Alo Tromp Nro 2 Edif. Kini kini Oranjestad, Aruba**